


Ni Presidente Thomas S. Monson



Nakasaganatayo Kadi?

Iti lugar a naminsan a nagnaedak ken nagserberiak idi, nangipagna ti Simbaan iti proyekto iti manukan, a dagiti boluntario manipud kadagiti lokal a ward ti kangrunaan a nagasikaso. Kaaduanna a panawen daytoy ket nadur-as a maipagpagna a proyekto, a mangabasto iti balay a pagidulinan dagiti bishop iti rinibribu a presko nga itlog ken ginasgasut a kilo ti naparti ken nadalusanen a manok. Nupay kasta, iti sumagmamano a gundaway, saan laeng a panagkapuyo iti ima dagiti nagboluntario nga agpart-time nga agay-aywan iti manok no di ketdi pay pannakapaay iti puso ken panunotda.

Kas pagarigan, kanayonkonto a malaglagip ti panawen a panangummongmi kadagiti agtutubo a lallaki iti Aaronic Priesthood tapno mangtedda iti maysa a proyekto ti panagdalus iti panawen ti kalgaw. Nagguummong ti nagaget ken naregta a grupo para iti proyekto ken sidadarasda a nagparut, nangummong, ken nangpuor iti adu a ruuot ken putputed a kayo. Babaen ti lawag dagiti mapupuoran a bonfire, nangankami iti hot dogs ket kinablaawanmi dagiti bagimi iti naileppas a nasayaat a trabaho.

Nupay kasta, adda maysa laeng a problema a mangted peggad. Ti ariwawa ken dagiti uram ket namagburibor unay iti nakain-inaka a populasion dagiti 5,000 nga agitlog a manok ta kaaduanna kadagitoy ti kellaat a naawanan iti dutdot ket nagsardengda a nagpessa. Kalpasan dayta binay-anmi ti sumagmamano a ruuot tapno makapagpappessakami iti ad-adu pay nga itlog.

Awan miembro ti Simbaan a timmulong a nangipaay kadagiti agkasapulan ti makalipat wenno pagbabawyanda

ti kasta a padas. Saan a baro kadakami ti kinagaget, kinasalimetmet, ken panagpannuray iti bagi, ken panagparabur iti dadduma.

Nasken a laglagipentayo a ti kasayaatan a sistema ti balay a pagidulinan para iti tunggal pamilia iti Simbaan ket maaddaan koma iti abasto a taraon, lupot, ken, no mabalin, dadduma pay a kasapulan ti panagbiag. Mairaman iti balay a pagidulinan ti Apo ti oras, talento, paglaingan, panangngaasi, naikonsagrang a banag, ken banag a pakaseknan iti kuarta dagiti napudno a miembro ti Simbaan. Magun-od dagitoy a pagalaan iti tulong wenno resources iti bishop iti panangtulong kadagiti agkasapulan.

Igunamgunammi iti amin a Santo iti Ud-udina nga Aldaw nga agbalinda koma a nasirib iti panagplanoda, agbalinda koma a naannad iti panagbiagda, ken liklikanda ti nalaus wenno di kasapulan a panagutang. Ad-adu pay a tao ti makalasad wenno makaibtur kadagiti rigat iti pakaseknan iti kuarta no adda abastoda a taraon ken lupot ken awan utangda. Ita nga agdama makitatayo nga adu dagiti saan a nangsurot iti daytoy a balakad: adda abastoda iti utang ken awan taraonda.

Ulitek ti impakdaar ti Umuna a Pangulueng sumagmamano a tawen ti napalabas:

“Nabalakadan dagiti Santo iti Ud-udina nga Aldaw iti adun a tawen nga agsaganada para iti panagrigat babaen ti panangidulin iti saggabassit a gatad ti kuarta. Ti panagurnong iti kuarta ket awan duadua a mangted iti talged ken pagimbagan. Adda pagrebbengan ti tunggal pamilia a mangipaay iti bukodna a kasapulan agingga a kabaelanna.

“Allukoyendakayo sadino man ti pagnaedanyo iti lubong nga agsaganakayo para iti panagrigat babaen ti panangkitayo iti kasasaad dagiti pakaseknanyo iti kuarta. Allukoyendakayo nga agbalin a nasalimetmet iti panag-gastoyo; disiplinanyo ti bagiyo iti panagatangyo tapno maliklikan ti panagutang. Bayadanyo a dagus ti utangyo agingga a kabaelanyo, ket wayawayaanyo ti bagiyo manipud iti daytoy a pannakaadipen. Masansan nga agurnongkayo iti bassit a gatad ti kuarta tapno in-inut a makapaaddakayo iti reserba a kuarta.”¹

Nakasaganatayo kadi para kadagiti saan a mapakpakadaan a pasamak iti biagtayo? Naan-anay kadin dagiti paglaingantayo? Agbibigtayo kadi a nasalimetmet? Adda kadi reserba nga abastotayo itan? Natulnogyo kadi kadagiti bilin ti Dios? Agtungtungpaltayo kadi kadagiti pan-nursuro dagiti propeta? Nakasaganatayo kadin a mangted iti sanikuatayo kadagiti nakurapay, kadagiti agkasapulan? Napudnotayo kadi iti Apo?

Agbibigtayo kadagiti nariribuk a panawen. Masansan a saan nga ammo ti masakbayan; ngarud allukoyennatayo nga agsagana para kadagiti saan a mapakpakadaan a pasamak. No dumteng ti oras a panangeddeng, naladawen ti oras a panagsagana.

NAGADAWAN

1. The First Presidency, *All Is Safely Gathered In: Family Finances* (pamphlet, 2007).

PANANGISURO MANIPUD ITI DAYTOY A MENSAHE

Iti panangibilang iti kasapulan dagiti sarsarungkaranyo, mangpanunot kadagiti wagas a pakatulunganyo kadakuada nga agbalin a managpannurray iti bukod a kabaelan iti trabaho, pakaseknan iti kuarta, pagidulinan iti taraon, ken panagsagana para iti di mapakpakadaan a panagkasapulan. Mangpanunot iti maysa a paglaingan a maibinglayyo kadakuada, kas iti panagmuyong wenno panagtarawidwid iti kuarta, a mangpatibker kadakuada a mangsurot iti balakad ni Presidente Monson.

AGTUTUBO

Nagserbiak Manen

Ni Jaíne Araújo

Maysa nga aldaw, kalpasan ti panangileppasko iti maysa a proyekto iti serbisio, magmagnaak idi

agingga a nadanonko ti meetinghouse ket nakitak ti dua a kakabsat a babbai nga agdaldalus iti pasdek. Gangangay laeng dagiti balikasko: “Kakabsat, kasapulanyo kad’ ti tulong?” Maysa kadakuada ti immisem kaniak ket kinunana a simmangpetak iti husto nga oras gapu sa is-isuda laeng ti agdaldalus ket nabannogdan. Kinunana a nagkararag nga ibaon koma ti Apo ti maysa a tao a tumulong. Naragsakanak unay a siak ti nagbalin a sungbat iti kararagna. Kalepleppasko a nangted iti serbisio iti maysa a tao ket nabannogak unayen, ngem sinurotko ti pusok ket indiyak ti agserbi nga ad-adda pay.

Maysa a bilin nga agrabaho a sirarag-o (kitaen iti DkK 24:7). No addaantayo iti tarigagay nga agserbi iti amin a gundaway, makatulungtayo a mapasamak dagiti milagro iti biag dagiti dadduma pay a tao. Agbalin a natatpateg ti biagtayo no agserbitayo. Pudno nga ayatennatayo ti Apo, tulonganna ti tunggal maysa kadagiti annakna, ken ikkannatayonto iti pigsang agserbi.

Agnanaed ti nagsurat iti Rio Grande do Norte, Brazil.

ANNAK

Nakasaganaka Kadi?

Dagiti sungbat: Pudno, Pudno, Palso, Pudno, Palso

Indawat ni Presidente Monson iti tunggal maysa kadatayo tapno agsaganatayo para kadagiti naririgat a panawen ken tapno tulongantayo dagiti dadduma kabayatan dagiti narigat a panawen ti biagda. Sungbatanyo daytoy pudno-wenno-palso a pannubok tapno makitayo no nakasaganakayon!

Kanayon a makasarakak iti maysa a tao a tulongak. Pudno Palso

Makapagyamanak iti amin a banag nga addan kaniak. Pudno Palso

Awananak iti ania man a talento tapno ibinglay iti asino man. Pudno Palso

Nasayaat a kapanunotan ti panagurnong iti kuarta para iti masakbayan. Pudno Palso

Kasapulak dagiti baro nga ay-ayam ken badbado tapno agbalinak a naragsak. Pudno Palso

© 2014 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *First Presidency Message, September 2014*. Ilokano. 10869 864



Pammati, Pamilia, Tulong

Ti Nadiosan a Mision ni Jesucristo: Mangliwliwa

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawat iti biag ken mision ti Mangisalakakan ket mangpapigsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti mainayon nga impormasion, mapan iti reliefsociety.lds.org.

Paset daytoy ti maysa a serye dagiti Mensahe iti Visiting Teaching a mangitampok kadagiti aspeto ti mision ti Mangisalakakan.

Inkari ni Jesucristo, “Dikayto baybay-an nga ul-ulila: umayakto kadakayo” (Juan 14:18). Ikkannakayonto iti “balangat iti lugar ti dapu, ti lana ti rag-o iti lugar ti dung-aw” (Isaias 61:3). Gapu ta sinagaba ni Cristo ti Pannubbot para iti tunggal maysa kadatayo, dinatayonto malipatan. “Inawat ti Mangisalakakan iti Bagina . . . dagiti saemtayo ken panagsagabatayo ken panagrigattayo tapno maammuanna no ania ti mariknatayo ken no kasano a liwliwaennatayo,” kinuna ni Linda S. Reeves, maikadua a mamagbaga iti Relief Society general presidency.¹

Iti pannakaammo a liwliwaennatayonto ni Cristo ket mabalina mangisangbay kadatayo iti talna ken mangparegta kadatayo a mangsurot iti pagwadanna babaen ti panagserbitayo kadagiti dadduma. Kinuna ni Presidente Thomas S. Monson: “Ti pannakaammotayo iti ebanghelio ken ti ayattayo iti Nailangitan nga Amatayo ken ti Mangisalakantayo ket mangliwliwa ken mangtunglongto kadatayo ken mangisangbay

kadatayo iti rag-o iti puspustayo no magnatayo a sililinteg ken agtungpaltayo kadagiti bilin. Awanto ditoy lubong ti makabael a mangparmek kadatayo.”²

Manipud kadagiti Nasantuan a Kasuratan

Juan 14:18, 23; Alma 7:11–13; Doktrina ken Katulagan 101:14–16

Manipud iti Pakasaritaantayo

Ni Elaine L. Jack, ti maika-12 a Relief Society general president, kinunana: “Iti visiting teaching agtitinnulongtayo. Masansan nga isao dagiti tignaytayo dagiti saan a maisao dagiti timektayo. Ti nabara nga arakup ket makaited iti napintas unay a komunikasion. Mamagkaykaysa kadatayo ti panagkatawa nga aggigiddan. Ti kanito a panagbibininglay ket mangpasadiwa kadagiti kararuatayo. Ditay kanayon a kabaelan a baklayen ti dagensen wenno parikut ti maysa a mariribukan, ngem matulongantayo wenno mapapigsatayo ti pakinakemna tapno kabaellan nga ibturan daytoy a naimbag.”³

Dagiti kakabsat a nagkauna a kameng ti Relief Society “nasarakanda

ti naespirituan a pigsa iti tunggal pamateg ken panangngaasi ti tunggal maysa. . . . Kabayatan ti panagsagabada kadagiti pannubok iti sakit ken ipapatay, nagkararagda a sipapammati para iti tunggal maysa ken liniwliwada ti tunggal maysa. ‘Siwawaya a naiburay ti ayat ti Dios iti tunggal maysa,’ insurat ni Helen Mar Whitney, ‘agingga a kasla naawan ti bileg ti maysa a nadangkes kadagiti panagkalikagumna nga umasideg iti nagbabaetantayo iti Apo, ken dagiti naranggas a pannubokna, iti dadduma a pagarigan, ti mangigapu iti panagladingittayo.”⁴

DAGITI NAGADAWAN

1. Linda S. Reeves, “The Lord Has Not Forgotten You,” *Ensign* wenno *Liahona*, Nob. 2012, 120.
2. Thomas S. Monson, “Be of Good Cheer,” *Ensign* wenno *Liahona*, Mayo 2009, 92.
3. Elaine L. Jack, iti *Daughters in My Kingdom: The History and Work of Relief Society* (2011), 119.
4. *Daughters in My Kingdom*, 34.

Panunotenyoy Daytoy

Kasano a mangyeg kadakayo iti liwliwa ti pannakaawat a manglaglagip ti Apo?